



O sin rivâts ae tierce ispirazion par scrivi une conte a teme, la prime che us proponìn vie pal 2011. Chest colp o lin a tirâ fûr un fat storic che, ca di pòc, al finis cincant agns juscj juscj. Cemût che o vês let intal titul o fevelin dal **riviel de Joibe Grasse dal 1511**, o sei la plui grande rivolte popolâr de storie furlane.

I ingredients par imbastî une biele conte a son une vore. Cun di fat, il riviel al nas dal incrosâsi di diviers elements. In plui des tensions sociâls che za di agns a jerin daûr a montâ intes campagnis furlanis, o cjatìn ancje la **faide tra Strumîrs e Çambarlans**, e il conflit in at jenfri la Republiche di Vignesie e l'Imperi voidât di Massimilian I di Austrie. No si à po di dismenteâsi che il riviel al sclope propit intal vîf dal Carnavâl: une suaze che e somee fate di pueste par chel “mont sotsore” là che contadins e popolans almancul par cualchi zornade a diventin i parons dal Friûl.

Dut al partìs di **Udin ai 27 di Fevrâr dal 1511** - o sei la zornade che e cole la Joibe Grasse - ma po il riviel si slargje a buine part de Patrie dal Friûl dulà che cetancj cjistiei e palaçs a vegnin cjapâts, metûts al sac e brusâts. Dut câs, par cualchi note storiche in plui o podês provâ a dâi un cuc ancje **achì**.

Cuntune suaze come cheste, e baste un tic di fantasie e lis contis a puedin diventâ milante e di ogni gjenar. No volìn però robâus il “mistîr”: nô us vin dade la ispirazion e cumò us tocje a voaltris di scrivi...

***Ispirazion domandade  
e rivade di Carli Pup***